



8. oktober 2020

Atassut

UKA 2020/71

Aqqalu C. Jerimiassen

**Inatsisartut Kukkunersiuinermut Ataatsimiititaliataata nalunaarusiamikkut sakkortuumik
isornartorsiuinerat qanoq iliornikkut malitseqartitsiviginissaa pillugu apeqquteqaat
aallaavigalugu oqallinnissamik siunnersuut.**

(Inatsisartunut ilaasortat Inuit Ataqatigiit, Parti Naleraq, Atassut, Suleqatigiisitsisut)

Nunani demokratiskiusuni Naalakkersuisoq taamatut unioqqutitsisaqattaarsimatilluni piffissaatillugu nammineq tunuartarpoq, parteeqataasaluunniit tunuaqqusarpaat parteertik annaakkumallugu tatiginartuutikkusullugulu. Massakkulli nunatsinni imatut oqaluttoqarpoq, sooq Naalakkersuisoq malersorneqassava? Kalaaleqatiniuna pisariaqartitsisoq ikioraa. Tassa uunga killissimavugut, unioqqutitsineq ajunngilaq. Taava imaannerpa unioqqutitsineq soqutaanngitsoq ikiuinermik siunertaqaraanni?

Tamassi, tamaavissi apererusuppassi, innuttaasut, inatsisartut. Nunatsinni demokratii illersorniarparput? Immaqaluunniit demokratii tassaassanerpa amerlanerussuteqaraanni tassa ajunngilaq unioqqutitsilaaraluallaraanni, amerlanerussuteqaraanni soqutaanngilaq. Taannaavormi demokratiip appasinnerpaarpaaffia.

Demokratii oqaasiinnartut imminik isumaqanngilaq, nunami aqutsinikkut iluamik atunngikkaanni. Pissaaneq akisussaaffiliivoq annerpaamik. Uagut taanna pissaaneq qanoruna atorusukkippit?

Pissaanerup agguataarneqarnerani Inatsisartuusugut Naalakkersuisunut nakkutilliisussaatitaavugut, aamma pisussaaffigaarput. Suliassarlu taanna eqquutsikkaluarlugu sumulluunniit atorsinnaanngippat pissaanerup pingasoqiusatut agguataarnera suli atuussimassanerpa? Massakkutut isikkoqartillugu Inatsisartukukkunersiuinermut ataatsimiititaliataata sakkortuumik isornartorsiuinera alaannarneqassappat, suut allat unioqqutitsinerit akueriinnarneqartuaannassappat? Alaannarneqarpammi takutinneqassaaq ersarissarneqarlunilu Nunatsinni Inatsisartut oqartussaassuseerussimasut, Naalakkersuisullu pissaanerat alligaluttuinnartoq.

Malittarisassat ersernerlussimappata, taava atornerlunneqassappat? Malittarisassatta inatsisittalu siunertaat nalunngikkaluarigut suunersut, oqaatsit paasiuminaassimappata atornerlunneqassappat pinngitsuusaarnermut? Tamatta maani inersuarmiittuusugut qinikkatut akisussaaffeqartuusugut malittarisassanik paatsoorniarsaralatalu avaqqussiniartussaanngilluinnarpugut.

Atassummiit pissutsit taamak ittut misigereerlugit peqataaffigumanagit Naalakkersuisooqatigiinniit anivugut. Inatsisartut Naalakkersuisooqatigiinniikkunik, illuatungiliuuttuugunilluunniit anngaaginnartussiassatut atuuttussaanngillat. Tamat oqartussaanerat illersorlugu, demokratii



tunngavigalugu aqtsineq illorsorlugu sulisussaavugut, tamannalu
ataqqilluinnarlugu pissaaneqarniarneq toqqarnagu Atassummiit timitalerlugu aamma
takutinnikuuarput.

Naalakkersuisooqatigiinni suleqataasut partiit allat aamma apererusunnarput, Inatsisartut
Kukkunersiuinermut Ataatsimiititaliaata isornartorsiuinera aamma tusaanngitsuusaarusunneraat.
Pissaanermik atornerluineq suli tunuliaqtaaffigerusuppaat? Taamaappallu suna tunngavigineqartoq
tamatsinnut, innuttaasunullu ersarissumik nassuaatigisariaqarpaat.

Malitseqartitsisoqanngippammi, ersarinnerpaamik inuiaqatigiinnut, nunarpullu tamakkerlugu
uppernarsineqassaaq ajortoqarluinnartoq. Ernumanarpoq, ersiummernarporluunniit siunissaq
qanoq issanersoq.

Massakkut maani inersuarmiittusugut takutittussanngorparput pissaaneq innuttaasuniit
tunniinneqartoq qanoq atorniarnerlutigu. Innuttaasunut takutittussanngorparput pissaaneqarneq
pillugu maaniinnerluta, immaqaluunniit eqqortumik iliuuseqarnissaq pillugu maaniinnerluta.

Lars Chemnitz issuaqqilaassavara: "Imaassanngilaq politikkerinngoraanni inuk qaffattoq...
kiffartuussissaaq"